

## Sumber bahan makanan asas di Sarikei masih mencukupi

Utusan Borneo (Sarawak)  
27 Apr 2020



**PANTAU:** Anggota KPDNHEP Sarikei melakukan pemeriksaan di beberapa premis perniagaan dan pembekal utama bahan makanan di Sarikei.

**SARIKEI:** Sumber bahan makanan asas di Sarikei masih mencukupi terutama untuk menampung keperluan masyarakat di kawasan ini dalam mengharungi Perintah Kawalan Pergerakan (PKP) fasa keempat dan sepanjang Ramadan.

Ketua KPDNHEP Sarikei Mohamad Zawawi berkata hasil pemantauan di beberapa premis perniagaan dan gudang sekitar Sarikei mendapati stok bahan makanan asas masih mencukupi dan mampu menampung keperluan pengguna.



“Melalui pemantauan dan pemeriksaan harian dijalankan kita mendapati bahan makanan asas seperti beras, minyak masak, gula, tepung gandum dan barangan lain masih mudah didapati.

“Oleh itu, kita ingin terus menyeru kepada masyarakat agar tidak melakukan pembelian panik dan membuat pembelian barangan berlebihan daripada keperluan semasa.

“Kita terus melakukan pemantauan terhadap situasi ini selain memastikan tiada peniaga mengambil kesempatan atau menaikkan harga barangan sesuka hati,” katanya ketika dihubungi di sini kelmarin.

Mohamad turut mengingatkan agar masyarakat berbelanja secara berhemah dan bijak mengatur perbelanjaan.

Mengenai penutup mulut dan hidung, beliau berkata sehingga kelmarin KPDNHEP Sarikei masih belum menerima sebarang aduan berkaitan peniaga menjual penutup mulut dan hidung pada harga mahal.

“Hasil pemantauan terutama di Sarikei, Pakan dan Julau mendapati peniaga menjual penutup mulut dan hidung pada harga ditetapkan iaitu RM1.50 sekeping atau RM75 sekotak mengandungi 50 keping,” jelasnya.

Beliau berkata, KPDNHEP Sarikei memohon peniaga agar sentiasa menyelenggara buku stok bagi membolehkan pihak kementerian dapat memantau penjualan barangan kawalan kepada pengguna.

“Peniaga juga dinasihati tidak menyorok atau enggan menjual barang kawalan kepada pengguna. Jika didapati ada peniaga ingkar, tindakan tegas akan diambil,” katanya.

Terdahulu, Mohamad bersama anggota KPDNHEP melakukan pemeriksaan di premis-premis perniagaan utama seperti pasar raya besar, pemborong utama, mini market, kedai runcit dan kategori lain premis perniagaan di sini.

“Usaha ini adalah untuk memastikan bekalan makanan asas mencukupi dan mampu menampung keperluan sepanjang tempoh PKP ini,” katanya.

<https://www.pressreader.com/malaysia/utusan-borneo-sarawak/20200427/281814286014608>